

四庫全書

子部

欽定四庫全書

說郭卷一百八下

元 陶宗儀 撰

相雨書

黃子發

常以戊申日候日欲入時日上有冠雲不問大小視四方黑者大雨青者小雨

候日始出日正中有雲覆日而四方有雲黑者大雨青者小雨

四方有雲如羊猪雨立至

四方北斗中有雲後五日大雨

四方斗中無雲唯河中有雲三枚相連狀如浴猪三日

大雨

以丙丁辰之日四方無雲唯漢中有者六十日風雨如

常

以六甲之日平旦清明東向望日始出時如日上有直

雲大小貫日中青者以甲乙日雨赤者以丙丁日雨白

者以庚辛日雨黑者以壬癸日雨黃者以戊己日雨

六甲日四方雲皆合者即雨

缺

方雨時視雲有五色黑赤並見者即止

--	--	--	--	--	--	--	--

水衡記

闕名

凌解水

黃河正月水名

桃花水

二月三月水名

麥黃水

四月水名

瓜蔓水

五月菰延蔓故以名

礬山水

六月水名

荻苗水

七月八月蒹葭花故以名

登高水

九月水名

復槽水

十月水落復故道

過凌水

十一月十二月水斷永結



--	--	--	--	--	--	--	--

峽船誌

王周

峽山之船與下之船大抵觀浮葉而為之其狀有難執而為用者或狀殊而用一或狀同而名異皆有謂也下之船有櫓有五兩有帆所以使風也尾有舵傍有棚上者以其山曲水急下有石皆不可用也狀直如舳前後各一者謂之稍船之斜正欹側為船之司命者稍類舵其狀殊而船之便於事者悉不如稍作稍詩舳槳橈棹拔使其進而無退利涉川澤為船之陳力者舳幾槳類

其狀同而異名也在船有力悉不如艖作艖詩峽水湍
浚激石忽發者謂之潰沱洑而澁者謂之腦岸石壁立
潰之忽作篙力難制以其木之堅韌竿直戟其首以竹
納護之者謂之戩竹為綫而勾其戩者謂之納為船之
良輔者戩與篙狀殊而用一也在船獨出悉不如戩作
戩詩巖石如齒非麻桌紉繩之為前牽取竹之筋者破
而用桌為紉以續之以備其牽者謂之百丈繫其船首
者謂之陽紐牽之者擊鼓以號令之人聲灘聲亂無以

相接所以節動止進退牽之防礙者謂之下緯濟其不通為船之先進者梟與竹狀殊而用一也在船先容悉不如百丈作百丈詩噫古人觀物因事為誌者甚多也予祇命憲局汭泝巴賚抵瞿唐耳目熟於長年三老輩矣船具之於船有力者作詩以稱之庶幾魯望茶經者也俾系其末

--	--	--	--	--	--	--	--

水經卷上

桑欽撰

河水

崑崙墟在西北去嵩高五萬里地之中也其高萬一千里
河水出其東北馭屈從其東南流入于渤海又出海外南
至積石山下有石門河水冒以西南流河水又南入葱嶺
山河水又西逕蜀賔國北河水又西逕月氏國南又西逕
安息南河水與蜺羅跂梯水同注雷翥海又西逕四大塔
北又西逕陀衛國北河水又東逕皮山國北其一流出于

開國南山北流與葱嶺河合東注蒲昌海河水又東與于
闐河合又西北流注于河南河又東逕于闐北南河又東
北逕扞彌國北南河又東逕且末國北北河又東北流分
為二水枝流出焉北河自踈勒逕流南河之北北河又東
逕莎車國南北河之東南逕溫宿國北河又東逕姑墨國
南河水又東逕注賓城南又東逕樓蘭城南而東注河水
又東注于渤海又東入塞過敦煌酒泉張掖郡南河水又
自東河曲逕西海郡南河水又東逕允川而歷大榆小榆

谷北又東過隴西河關縣北洮水從東南來流注之河水
又東北流入西卑郡界左合二川南流入河又東北濟川
水注之河水東又逕澆河故城北河水又東北逕黃川城
河水又東逕石城南左合北谷水河水又東北逕黃河城
南河水又東北逕廣遠城北又合烏頭川水河水又東逕
邯川城南河水又東臨津谿水注之河水又東逕津城西
北白土城南河水又東左會白土川水河水又東北會兩
川右合二水河水又東得野亭南河水又東歷鳳林北

河水又東與灘水合河水又逕左南城南大河又東逕赤岸北河水又東洮水注之又東過金城允吾縣北河水又東逕石城南又東過榆中縣北又東過天水北界又北過武威媼圍縣東北又東北過天水勇士縣北又東北過安定北界麥田山河水東北流逕安定祖厲縣故城西北河水又東北逕麥田城西又北與麥田泉水合河水又東北逕麥田山西河水又東北逕于黑城北又東北高平川水注之河水又東北逕朐卷縣故城西

河水又北過北地富平縣西河水又北逕富平縣故城
西河水又北薄骨律鎮城河水又逕典農城東河水又
北逕典農城東河水又東北逕廉縣故城東河水又與
北枝津河水又東北逕渾懷鄣西河水又東北歷石崖
山西又北過朔方臨戎縣西河水又北逕臨戎縣故城
西河水又北有枝渠東出謂之銅口東逕沃野故城南
河水又北屈而為南河出焉河水又北迤西溢於窳渾
縣故城東河水又屈而東流為北河東逕高闕南河水

自臨河縣東逕陽山南河水又南逕馬陰山西河水又
東南逕朔方縣故城東北河水自朔方東轉逕渠搜縣
故城北河水又東逕成宜縣故城南河水又東逕原亭
城南河水又東逕宜梁縣之故城南河水又東逕稠陽
城南又東過臨沃縣南河水又東枝津出焉河水又東
流石門水南注之河水又東逕稠陽縣故城南河水又
東逕塞泉城南而東注又東過雲中楨陵縣南又東過
沙南縣北從縣東屈南過沙陵縣西河水屈而流白渠

水注之河水南入楨陵縣西北又南過赤城東又南過
定襄桐過縣西河水於二縣之間濟有君子之名河水
又東南左合一水河水又南樹頽水注之河水又南大
羅水注之河水又左得滴水口又南過西河固音銀陽縣
東河水又東端水入焉河水又南諸次之水入焉河水
又南湯水注之又南離石縣西奢延水注之河水又南
陵水注之河水又南得離石水口又南過中陽縣西又
南過土軍縣西河水又南合契水河水又南得大蛇水

河水又南又納辱水又南過上郡高奴縣東河水又南蒲川石樓山南逕蒲城東河水又南過河東北屈縣西河水又南得鯉魚河水又南羊求水入焉河水又南為採桑津又南過皮氏縣西河水又南合蒲水河水又南逕丹水西南河水又南黑水注之河水又南至崕谷傍河水又南洛水自獵山枝分東派東南注于河又南出龍門口汾水從東來注之河水又南右合暢谷水河水又南逕梁山原東河水又南崕谷水注之河水又南右

合陶渠水河水又西徐水注之河水又南逕子夏石室
又南過汾陰縣西河水又逕邵陽城東河水又南逕陶
城西又南過蒲坂縣西河水又南逕雷首山西又南涑
水注之又南至華陰潼關渭水從西來注之河水歷船
司空與渭水會河水又東北玉澗水注之河水又東逕
閿鄉侯河東與全鳩澗水合又東過河北縣南河水又
東永樂澗水注之河水自河北城南東逕芮城河水又
會槃澗河水又東逕湖縣故城北河水又東合柏谷水

河水又東右合門水又東過陝縣北又西逕陝縣故城南又東過大陽縣南河水又東逕大陽縣故城南河水又東沙澗水注之又東過砥柱間河之右則靖水注之河水又東千靖之水注焉又東過平陰縣北又東至鄧清水從西北來注之河水又東與教水合河水又與畛水合河水又東合庸庸之水河水又東逕平陰縣北河水西會濊水

一作右會

河水又東過平陰縣北湛水從北來

注之河水又東逕河陽縣故城南河水又逕臨平亭北

河水又東逕洛陽縣北河水又東逕平縣故城北河水
又東溟水入焉又東沛水注焉又東過鞏縣北洛水從
縣西北流注之又東過成臯縣北濟水從北來注之河
水又逕黃馬坂北河水又東逕旋門坂北河水東逕成
臯大伾山下河水南對玉門河水又東合汜水河水又
東逕板城北河水又東逕五龍塢北又東過滎陽縣瀆
蕩渠出焉河水又東北逕卷之扈亭北河水又東逕八
激堤北河水又東逕卷縣北河水又東北逕赤岸固北

而東北注之又東北過武德縣東沁水從之東至酸棗
縣西濮水東出焉河水又東北通謂之延津河水又逕
東燕縣故城北則有濟水自北來注之河水又東淇水
入焉又東逕遮害亭南河水又東右逕滑臺城又東北
過黎陽縣南河水自津東北逕涼城縣河水又東北逕
伍子胥廟南河水又東北為長壽津故瀆東北逕戚城
西故瀆又逕繁陽縣故城東北逕陰安縣故城西故瀆
又東北逕昌樂縣故城東故瀆又東北逕平邑郭西又

東北逕元城縣故城西北而至沙丘堰至于文陸北播
為九河河之故瀆自沙丘堰南分屯氏河出焉河水故
瀆東北逕發干縣北城西又屈逕其北大河故瀆又東
逕貝丘縣故城南大河故瀆又東逕甘陵縣故城南大
河故瀆又東逕平原縣故城西而北絕屯氏三瀆北逕
繹幕縣故城東北西流逕平原鬲縣故城西大河故瀆
又北逕脩縣故城東又北逕安陵縣西大河故瀆北出
為屯氏河逕館陶縣東東北出左瀆又北逕經城東繚

城西又逕南宮縣西北注絳瀆右瀆又東北逕廣宗縣
故城南又東北逕界城亭北又東北逕長樂郡武彊縣
故城東又東北逕廣川縣與水故道合又東北逕廣川
縣故城西又東逕棘津亭南張甲故瀆又東北至脩縣
東會清河屯氏別河東枝津出焉東逕信成城南又東
逕青陽縣故城南清河郡北又東北逕陵鄉南又東北
逕東武城縣故城南又東北逕東陽縣故城南屯氏別
瀆又東北逕清河郡南又東北逕清河故城西屯氏別

河北瀆東逕繹幕縣故城南東邑大河故瀆又東北逕平原縣枝津北出至安陵縣遂絕屯氏別河北瀆又東北逕重平縣故城南屯氏別河北瀆又東入陽信縣今無水又東為咸河東北流逕陽信縣故城北屯氏別河南瀆自平原東絕大河故瀆又逕平原縣故城北東北枝津又出東北至安德縣界東會商河屯氏別河南瀆又東北於平原界又有枝渠右出至安德縣遂絕屯氏別河南瀆自平原城北首受大河故瀆東出亦通謂之

篤馬河東北逕安德縣故城西又東北逕臨齊城南始
又屈逕其城東故瀆廣四十步又東北逕重丘縣故城
西又東北逕西平昌縣故城北又逕般縣故城北東逕
樂陵縣故城北又東北逕陽信縣故城南東北入海屯
氏河故瀆自別河東逕甘陵之信鄉縣故城南屯氏故
瀆又東逕甘陵縣故城北逕靈縣北又東北逕鄒縣與
鳴犢河故瀆合上承大河故瀆於靈縣南東北逕靈縣
東東入鄒縣而北合屯氏瀆又東北右過衛國縣南又

東北過濮陽縣北狄子河出焉河水東逕鐵丘南河水
東北流而逕濮陽縣北為濮陽津河水又東北逕衛國
縣南東為郭口津河水又東逕鄆城縣北

一作國名

河水又

東北逕范縣之秦亭西河水又東北逕委粟津左會浮
水故瀆故瀆東絕大河故瀆東逕五鹿之野浮水故瀆
又東南逕國邑又東逕衛國縣故城南古斟灌浮水故
瀆又東逕河牧城而東北出又東北入東武陽縣東入
河又有漯水出焉河水又東逕武陽縣東范縣西而東

北流也又東北過東阿縣北河水於范縣東北流為倉
亭津河水又歷柯澤逕東阿縣故城西而東北出流注
又東北過茌平縣西河自鄧里渠東北逕昌鄉亭北逕
碯礧城西河水又與鄧里渠水上承大河於東阿縣西
東逕東阿縣故城北又東北逕臨邑縣與將渠合又北
逕茌平縣東臨邑縣故城西北流入於河河水又東北
流逕四瀆津又東北過高唐縣界

漯水

漯水又東北逕清河縣故城北漯水又東北逕文鄉城
東南又東北逕博平縣右與黃溝同注川澤又東逕文
鄉城又東南逕王城北黃溝又東北逕左與漯水隱覆
勢鎮河陸東出於高唐縣大河右迤東注漯水矣漯水
又東北逕援縣故城西漯水又逕高唐縣故城東漯水
又東北逕漯陰縣故城北漯水又東北逕著縣故城南
又東北逕崔氏城北漯水東南逕東朝陽縣故城南漯
水又東逕漢徵君伏生墓南漯水又東逕鄒平縣故城

北又東北逕界東鄒城北漯水又東北逕建信縣故城
北漯水又東北逕千乘縣二城間又東北為馬常坑又
東北過楊墟縣東商河出焉商河又北逕平原縣東又
逕安德縣故城南又東北逕昌平縣故城南又東逕般
縣故城南又東逕樂陵縣故城南商河又東逕初鄉縣
故城南沙溝水注之商河又東北流逕馬嶺城西北而
流屈而東注南轉逕城東商河又東北逕富平縣故城
北商河又分為二水南水謂之長聚溝北水世又謂之

白薄瀆大河又東北逕高唐縣故城西大河又北逕張
公城臨側河湄河水又北逕平原縣故城東大河右溢
世謂之甘棗溝故瀆又東北歷長隄逕溫陰縣北河水
又東北逕陽阿縣故城西又東北過漯陽縣北河水自
平原左逕安德城東而北為鹿角津東北逕般縣樂陵
初鄉厭次縣故城南厭次河河水又逕漯陽縣故城北
一作逕右河水又東北為漯沃津河水又東逕千乘城北又東
北過黎城縣北又東北過甲下邑濟水從西來注之又

東北入于海河水又東分為二水枝津東逕甲下城南
東南歷常沈注濟

汾水

汾水出太原汾陽縣北管涔山東南過晉陽縣東晉水
從縣東南流注之又南洞渦水從東來注之又南過大
陵縣東又南過平陶縣東文水從西來流注之又南過
寇爵津一作冠又南入河東界又南過永安縣西又南過
楊縣東西南過高梁邑西又南過平陽縣東又南過臨

汾縣東又屈從縣南西流又西過長修縣南又西過皮氏縣南又西至汾陰縣北西注于河

澮水

澮水出河東絳縣東澮交東高山西過其縣南又西南過虎祁宮南又西至王橋注于汾水

涑水

涑水出河東聞喜縣東山黍葭谷又西過周陽邑南又西南過其縣南又西南過安邑縣西又南過解縣東又

西南注于張陽池

文水

文水出大陵縣西山文谷東到其縣屈南到平陶縣東北東入于汾

原公水

原公水出茲氏縣西羊頭山東過其縣北又東入于汾

洞渦水

洞渦水出沾縣北山西過榆次縣南又西到晉陽縣南

西入于汾出晉水下口者也

晉水

晉水出晉陽縣西縣甕山又東過其縣南又東入于汾水

湛水

湛水出河內軹縣西北山東過其縣北又東過皮縣之北又東過毋辟邑南又東南當平陰縣之東北南入于河

濟水

濟水出河東垣縣東王屋山為沅水又東至溫縣西北
為濟水又東過其縣北屈從縣東南流過墳城西又南
當鞏縣北南入于河與河合流又東過成臯縣北又東
過滎陽縣北又東至北礫礪南東出過滎陽北濟水又
東逕西廣武城北濟水又東逕東廣武城北濟水又東
逕敖山北濟水又東合滎瀆濟水又東逕滎陽縣北濟
水又東南礫石溪水注之濟水又東索水注之又東過

陽武縣北濟水又東北流南濟也逕陽武縣故城南濟水又東逕封丘縣南濟水又東逕東昏縣故城北濟水又東逕濟陽縣故城南又東過封丘縣北北濟也濟水又東逕原武縣故城南濟瀆又東逕酸棗縣之烏巢澤北又東過平丘縣南北濟也濟水者又東過濟陽縣北濟也又東過宛朐縣南又東過定陶縣南南濟也濟水又東北荷水東出焉濟水又東逕秦相魏冉冢濟水又東北逕定陶恭王陵南濟水又東北逕定陶縣故城南

又屈從縣東北流南濟也濟水又東至乘氏縣西分為
二南為荷水北為濟瀆北濟又東北逕宛朐縣故城北
又東北與濮水濟水故瀆又北右合洪水又東北過壽
張縣西界安民亭南汶水從東北來注之濟水又北逕
須朐城西濟水又逕微鄉東又北過須昌縣西濟水又
北逕漁山東左合馬頰水濟水自魚山北逕清亭東又
北過穀城縣西濟水又北逕周首亭西又北過臨邑縣
東濟水又北逕平陰城西濟水又東北至垣苗城西又

東北過盧縣北濟水又逕盧縣故城北濟水又東北與
中川水合濟水又東北右會玉水濟水又東北灤水出
焉濟水又東北華不注山又東北過臺縣北濟水又東
北合芹溝水又東北過管縣南又東過梁鄒縣北又東
北過臨濟縣南濟水又東北迤為淵渚謂之平州濟水
又東北逕樂安縣故城南又東北過利縣西又東北過
甲下邑入于河又東北入海其一水東流者過乘氏縣
南又東過昌邑縣北又東過金鄉縣南又東過東緡縣

北濟水又東逕漢平狄將軍扶溝侯淮陽朱鮪冢又東過方與縣北為河水濟水東逕重鄉城南河水又東過湖陸縣南東入於泗水又東南過沛縣東北又東南過留縣北又東過彭城縣北睢水從西來注之濟水又南逕彭城縣故城東又東南過徐縣北又東至下邳睢陵縣南入于淮

清水

清水出河內修武縣之北黑山東北過獲嘉縣北又東

過汲縣北又東入于河

沁水

沁水出上黨沮縣謁戾山南過穀遠縣東又南過猗氏縣東又南過陽阿縣東又南出山過沁水縣北又東過野王縣北又東過周縣北又東過邢丘一曰懷縣之北又東過武德縣南又東南至滎陽縣北東入于河

洪水

洪水出河內隆慮縣西大號山又東過內黃縣南為白

溝屈從縣東北與洹水合又東北過館陶縣北又東北
過清淵縣西又東北過廣宗縣東為清河又東北過東
武城縣西又北過廣川縣東又東過脩縣南又東北過
東光縣西又東北過南皮縣西又東北逕浮陽縣西又
東北過澣邑北又東北過鄉邑南又東北逕窮河邑南
又東北過漂榆邑入于海

蕩水

蕩水出河內蕩陰縣西山東又東北至內黃縣入于黃

澤

洹水

洹水出上黨洹氏縣東過隆慮縣北又東北出山逕鄴縣南又東過內黃縣北東入于白溝

濁漳水

濁漳水出上黨長子縣西發鳩山之漳水焉東過其縣南屈從縣東北流注又東過壺關縣北又東北過屯留縣潞縣北又東過武安縣又東出山過鄴縣西又東過

列入縣南又東北過斥漳縣南又東北過曲周縣東又東北過鉅鹿縣東又北過堂陽縣西又東北過扶柳縣北又東北過信都縣西又東北過下博縣之西又東北過阜城縣北又東北至昌亭與滹沱河會又東北至樂成陵縣別出北又東北過成平縣南合清河又東北過章武縣西又東北過平舒縣南東入海

清漳水

清漳水出上黨沾縣西北少山大黽谷南過縣西又從

縣南屈東過涉縣西屈從縣南東至武安縣南泰寧邑
入于濁漳

易水

易水出涿郡故安縣閭鄉西山東過范陽縣南又東過
容城縣南又東過安次縣南又東過東州縣南東入于
海

漣水

漣水出代郡靈丘縣高氏山南過廣昌縣南又東南過

中山上曲陽縣北恒水從西來注之又東過唐縣南又東過安喜縣南又東過安國縣北又東過博陵縣南又東北入于易

聖水

聖水出上谷東過良鄉縣南又東過長鄉縣北又東過安次縣南東入于海

巨馬水

巨馬河出代郡廣昌縣涑山東過迤縣北又東南過容

城縣北又東南至泉州縣西南東入八丈溝又南又東過勃海東平舒縣北東入于海

濕水

濕水出鴈門陰館縣東北過代郡桑乾縣南又東過涿鹿縣北又東南出山過廣陽薊縣北又東至漁陽雍奴縣西入筍溝

濕餘水

濕餘水出上谷居庸關東又東流過軍都縣南又東流

過薊縣北又北屈東南至狐奴縣西入于沽河

沽水

沽河從塞外來南過漁陽狐奴縣北西南與濕餘水合為沽河又東南至雍奴縣西筭溝又東南至泉州縣與清河合東入于海清河者派河尾也

鮑丘水

鮑丘水從塞外來南過漁陽縣東又南過潞縣西又南至雍奴縣北屈東入于海

濡水

濡水從塞外來東南過遼西令支縣北又東南過海陽縣西南入于海

大遼水

大遼水出塞外衛白平山東南入塞過遼東襄平縣又東南過房縣西又東過安市縣西南入于海又玄菟高句麗縣有遼山

小遼水

小遼水所出西南至遼隧縣入于大遼水也

湏水

湏水出樂浪鏤方縣東南過於臨湏縣東入于海

洛水

洛水出京兆上洛縣謹舉山洛水又東戶水注之洛水
又東得乳水洛水又東會于龍餘之水洛水又東門水
出焉洛水又東逕熊耳山北東北過盧氏縣南洛水逕
陽渠關北洛水又東逕盧氏縣故城南洛水東與高門

水合洛水又東松楊谿水注之洛水又東庫谷水注之
又東北過蠡城邑之南又東過陽市邑南又東北過于
父邑之南洛水又東渠谷又東北過宜陽縣南洛水又
東逕宜陽縣故城南又東北出散關南洛水又東枝瀆
左出焉又東北過河南縣南又東過洛陽縣南伊水從
西來注之又東過偃師縣南洛水又北陽渠水注之洛
水又東逕訾城北又東羅水注之又東北過鞏縣東又
北入于河洛水又東北流入于河

伊水

伊水出南陽縣西蔓渠山東北過郭落山又東北過陸渾縣南又東北過新城縣南又東北過伊闕中又東北至洛陽縣南北入于洛

瀍水

瀍水出河南穀城縣北山東與千金渠合又東過洛陽縣南又東過偃師縣又東入于洛

澗水

澗水出新安縣南白石山東南入於洛

穀水

穀水出弘農黽池縣南墻塚林穀陽谷東北過穀城縣北又東過河南縣北東南入于洛

甘水

甘水出弘農宜陽縣鹿蹄山東北至河南縣南北入洛

漆水

漆水出扶風杜陽縣俞山東北入于渭

澧水

澧水出京兆藍田谷北入于灊

沮水

沮水出北地直路縣東過馮翊郡北東入于洛

渭水

渭水出隴西首陽縣渭谷亭南鳥鼠山又北過襄武縣北又東過獮道縣南又東過冀縣北又東過上邽縣又東過陳倉縣西又東逕武功縣北又東芒水從南來流

注之渭水又東過槐里縣南又東澇水從南來注之渭水又東北逕黃山宮南就水注之渭水又東合田谿水渭水又東逕槐里縣故城南渭水又東合甘水又東豐水從南來注之渭水又東北與鎬水合渭水又東北逕渭城南而沈水注之又東過長安縣北渭水又東與沈水枝津合渭水又逕長安城北又東過華陰縣北又東過鄭縣北又東過霸陵縣北霸水從縣西北流注之東入于河

漾水

漾水出隴西氐道縣嶠冢山東至武都沮縣為漢水又東南至廣魏白水縣西又東南至葭萌縣東北與羌水合又東南過巴郡閬中縣又東南入漢州江津縣東南入于江

丹水

丹水出京兆上洛縣西北冢嶺山東南過其縣南又東南過商縣南又東南至于丹水縣入于汭

汝水

汝水出河南梁縣勉鄉西天息山東南過其縣北又東南潁川郟縣南又東南過定陵縣北又東南過鄧縣北又東南過汝南上蔡縣西又東南過平輿縣南

一作平輿又

東至原鹿縣南入于淮

[illegible]

水經卷下

潁水

潁水出潁川陽城縣西北少室山又東南過其縣南又
東南過陽翟縣北又東南過潁陽縣西又東南過潁陰
縣西南又東南至慎縣東南入于淮又東南過臨潁縣
南又東南汝南潁強縣北洧水從河南密縣東流注之
又東過西華縣北又南過汝陽縣北又東南過南頓縣
北潁水從西來流注之又東南至新陽縣北滾蕩渠水

從西北來注之

洧水

洧水出河南密縣西南馬領山又東南過其縣南又東過鄭縣南鄆水從西北來注之又東南過長社縣北又東南過新汲縣東北又東南過茅城邑之東北又東過習陽城西折入于潁

潁水

潁水出河南密縣大騁山東南入于潁

潯水

潯水出鄭縣西北平地東過其縣北又東南過其縣東
又南入于洧水渠出滎陽北河東南過中牟縣之北又
東至浚儀縣又屈南至扶溝縣北其一者東南過陳縣
也又東南至汝南新陽縣北又東南過山桑縣北又東
南過龍亢縣南又東南過義城縣西南入于淮

陰溝水

陰溝水出河南陽武縣狼觴渠東南至沛為過水又東

南至下邳淮陵縣入于淮

汧水

汧水出陰溝于浚儀縣北又東至梁郡蒙縣為濉水餘波南入淮陽城中汧水出汧水於梁郡蒙縣北又東過蕭縣南又東至彭城縣北東入于泗

睢水

睢水出梁郡鄆縣又東過睢陽縣南又東過相縣南屈從城北東流當蕭縣南入于淮

瓠子水

瓠子河出東郡濮陽縣北河東至濟陰句縣為新溝又東北過廩丘縣為濮水又北過東郡范縣東北為濟渠與將渠合又東北過東阿縣東又東北過臨邑縣西又東北過茌平縣東為鄧里渠又東北過祝阿縣為濟渠又東北至梁鄒縣西分為二其東北者為濟河其東者為時水又東北至濟西濟河東北入于海時水東至臨淄縣西屈南過太山華縣東又南至費縣東入于沂

汶水

汶水出太山萊蕪縣原山西南過嬴縣南又東南過奉
高縣北屈從縣西南流過博縣西北又西南過蛇丘縣
南又西南過岡縣北又西南過平章縣南又西南過無
鹽縣南又西南過壽張縣北又西南至安民亭入于濟

泗水

泗水出魯卞縣北山西南逕魯縣北又西過瑕丘縣東
屈從縣東南流瀛水從東來注之又南過平陽縣西又

南過高平縣西洸水從北西來流注之又南過方輿縣
東荷水從西來注之又屈東南過湖陸縣南洧涓水從
東北來流注之又南過沛縣東又東逕山陽郡又東南
過彭城縣東北又東南過呂縣南又東南過下邳縣西
又東南入于淮

沂水

沂水出泰山蓋縣艾山南過琅邪臨沂縣東又南過開
陽縣東又東過襄賁縣東屈從縣南西流又屈南過剡

縣西又南過良城縣西又南過下邳縣西南入于泗

洙水

洙水出泰山蓋縣臨樂山西南至卞縣入于泗

沫水

沫水出琅邪東莞縣西北山東南過其縣東又東南過

莒縣東又南過陽都縣東入于沂

巨洋水

巨洋水出朱虛縣泰山北過其縣西又北過臨朐縣東

又北過劇縣西又東北過壽光縣西又東北入于海

淄水

淄水出泰山萊蕪縣原山又東北過臨淄縣東又東過利縣東又東北入于海

汶水

汶水出朱虛縣泰山北過其縣東又北過淳于縣西又東北入于海

濰水

濰水出琅邪箕縣東北過東武城縣西又北過平昌縣
東又北過高密縣西又北過淳于縣東又東北逕都昌
縣東又東北入于海

膠水

膠水出黔陬縣膠山北過其縣西又北過夷安縣東又
北過當利縣西北入于海

沔水

沔水出武都沮縣東狼谷中沔水又東南逕沮水戍而

東南流注漢曰沮口沔水又東逕白馬戍南瀘水入焉
沔水又東逕武侯壘南又東逕沔陽故城南沔水又東
逕西樂城北漢水又左得度口水漢水又東黃沙水左
注之漢水又東合褒水漢水又東逕漢廟堆下又東過
南鄭縣南漢水又東得長柳渡漢水又左會文水漢水
又東黑水注之又東過城固縣南又東過魏興安陽縣
南涔水出自旱山北注之漢水又東至瀼城南與洛谷
水合漢水又東逕小城固南漢水又東逕石門灘漢水

又東逕媯墟為灘漢水又東逕猴經灘漢水又東逕小
大黃金南漢水又東合蘧蔭漢口漢水又東右會洋水
漢水又東歷教頭漢水又東合直水漢水又東逕直城
南漢水又東逕晉昌郡之寧都縣南漢水又東逕魚脯
谿口又東過西城縣南漢水又東右得大勢漢水右對
月谷口漢水又東逕西城縣故城南漢水又東為鱣湍
漢水又東合旬水漢水又東逕木蘭塞南漢水又東左
得育漢漢水又東逕魏興郡之錫縣故城北漢水又東

歷姚方沔水又東過襄陽縣北沔水又東合檀谿水沔水又逕平魯城南又從縣東屈西南涓水從北來注之沔水中有魚梁洲沔水又逕桃林亭東沔水又東南逕蔡洲沔水又東南邑城北沔水又東合洞口又東過中廬縣東淮水自房陵縣淮山東流注之沔水又東南流逕叅丘故城西又南過郢縣東北一作印沔水又南得木里水會又南過宜城縣東沔水出自房陵縣東流注之沔水又逕郡縣故城南沔水又東敖水注之沔水又東

南與白水合沔水自荊城東南流逕當陽縣之章山東
沔水又東右會權口沔水又東南與陽口合又東南逕
江夏雲杜縣東夏水從西來注之沔水又東逕左桑沔
水又東合區亮水口沔水又東得合驛口沔水又東謂
之橫桑沔水又東謂之鄭潭沔水又東得成沔沔水又
東與力口合沔水又東南瀕入水焉沔水又東逕沌陽
縣北又南至江夏沙羨縣北南入于江沔水與江合流
又東過彭蠡澤又東北出居巢縣南又東過牛渚縣南

又東至石城縣分為二其一東北流其一又過毗陵縣
北為北江南江又東與貴長池水合南江又南東逕宣
城之臨城縣南南江又東與桐水合南江又東逕寧國
縣南南江又東北為長瀆歷河口東則松江出焉江水
奇分謂之三江口又東至會稽餘姚縣東入于海江水
又東逕黃橋下江水又東逕餘姚縣故城南江水又東
注于海又東過堵陽縣堵水出焉自上粉縣北流注之
又東過鄖鄉縣南漢水又東逕鄖鄉縣故城南漢水又

東逕琵琶谷口又東北流又屈東南過武當縣東北漢水又東為猓子潭漢水又東南逕武當縣故城北漢水又東平陽川水注之沔水又東南逕縣城東沔水又東逕龍巢山下又東南逕涉都縣東北又東南過鄮縣之西南又南逕穀城東又南過陰縣之西沔水又東南得洛谿口又南過筑陽東筑水出自房陵縣東過其縣南流注之又東逕學城南沔水又南逕筑陽縣東沔水又東為漆灘又東過山都縣東北沔水又東逕樂山北沔

水又東逕隆中

潛水

潛水出巴郡宕渠縣又南入于江

湍水

湍水出酈縣北芬山南流過其縣東又南過冠軍縣東
又東過白牛邑南又東南至新野縣東入于消

均水

均水出淅縣北山南流過其縣之東又南當涉都邑縣

北南入于沔

粉水

粉水出房陵縣東流過郢邑南又東過穀邑南東入于沔

白水

白水出朝陽縣西東流過其縣南又東至新野縣西東入于涇

泚水

泚水出泚陽東北太胡山東南流逕其縣南泄水從南來注之又西至新野縣南入于清

淮水

淮水出南陽平氏縣胎簪山東北過桐栢山淮水又東逕義陽縣淮水又逕義陽縣故城南淮水又東得澍口水東過江夏平春縣北淮水又東油水注之淮水又東北與大木水合淮水又東北流左會湖水淮水又東逕安陽縣故城南又東逕新息縣南淮水又東逕浮光山

北淮水又東合壑水淮水又東北申陂枝水注之淮水
又東逕淮陰亭北又東逕白城南淮水又東逕長陵戍
南又東青陂水注之淮水又東北合黃水又東過期思
縣北淮水又東北潁水注之一作潁東過原鹿縣南汝水
從西北來注之又東過廬江安豐縣東北決水從北來
注之淮水又東谷水入焉淮水又東北左會潤水淮水
又東北窮水入焉又東北至九江壽春縣西泚水洪水
合北注之又東潁水從西北來流注之淮水又東流與

潁口會東南逕倉陵北又東北流逕壽春縣故城西淮
水又北左合椒水又東過壽春縣北肥水從縣東北流
注之淮水又北逕山碛中謂之碛石淮水又北逕莫耶
山西又東過當塗縣北渦水從西北來注之淮水又東
北濠水注之淮水又北沙水注之又東過鍾離縣北淮
水又東逕夏丘縣南淮水又東逕浮山淮水又東逕徐
縣南歷澗水注之淮水又東池水注之淮水又東蘄水
注之淮水又東歷客山逕盱眙縣故城西又東北至下

邳淮陰縣西泗水從西北來流注之又東過淮陰縣北
中瀆水出白馬湖東北注之又東兩小水流注之又東
至廣陵淮浦縣入于海

澧水

澧水出南陽魯陽縣西之堯山東北過潁川定陵縣西
北又東過郢縣南東入于汝

涓水

涓水出弘農盧氏縣攻離山東南過南陽西郢縣西北

又東過宛縣南又屈南過滎陽縣東又南過新野縣西
西過鄧縣東南入于沔

潁水

潁水出潁強縣南澤中東入潁

濯水

濯水出汝南吳房縣西北興山東過其縣北入于汝

瀕水

瀕水出滎陰縣東上界山東過吳房縣南又東過濯陽

縣南又東過上蔡縣南東入汝

澠水

澠水出澠陰縣西北扶子山東過其縣南又東過西平縣北又東過郛縣南又東過定潁縣北東入于汝

澠水

澠水出蔡陽縣東南逕隋縣西又南過江夏安陸縣西又東南入于夏

澠水

潒水出江夏平春縣西南過安陸入于潒

蘄水

蘄水出江夏蘄春縣北山南過其縣西又南至蘄口南入于江

決水

決水出廬江雩婁縣南大別山北過其縣東又北過安豐縣東又北入于淮

泚水

泚水出廬江灊縣西南霍山東北東北過六縣東北入于淮

泄水

泄水出博安縣北過芍陂西與泚水合西北入于淮

肥水

肥水出九江成德縣廣陽鄉西肥水別北過其縣西北入芍陂又北過壽春縣東北入于淮

施水

施水亦從廣陽鄉東南入于湖

沮水

沮水出漢中房陵縣淮水東南過臨沮縣界又東南過枝江縣東南入于江

漳水

漳水出臨沮縣東荆山東南過蓼亭又東過章鄉南又南至枝江縣北烏扶邑入于沮

夏水

夏水出江流于江陵縣東南又東過華容縣南又東至江夏雲杜縣入于沔

羌水

羌水出羌中叅糧又東南至廣魏白水縣與漢水合又東南過巴郡閬中縣又南至墊江縣東南入于江

涪水

涪水出廣魏涪縣西北南至小廣魏與梓潼合

梓潼水

梓潼水出其縣北界西南入于涪又西南至小廣魏縣南入于墊江

涪水

涪水出漢中南縣東南旱山北至沔陽縣南入于沔

江水

岷山在蜀郡氐道縣大江所出東南過其縣北江水自天彭關東逕汶關而歷氐道縣北又有湔水入焉江水又東別為沱江水又歷都安縣又東南過犍為武陽縣

青衣水沫水從西南來合而注之又東南過樊道縣北
若水淹水合從西來注之又東注水北流注江水又與
符黑水合又東過江陽縣南洛水從三危山東過廣魏
洛陽南東南注之江水逕漢安縣北江水東逕樊石灘
又逕大附灘又東過符縣北邪東南紹部水從符關東
北注之又東北至巴郡江州縣東強水涪水漢水白水
宕渠水并合南流注之又江水東至枳縣西延江從牂
牁郡北流西屈注之又逕東望峽東歷平都江水又逕

虎鬚灘江水又東逕臨江縣南江水又東得黃華水口
左逕石城南又東至平洲又東逕壤塗而歷和灘又東
逕界壇江水又東右得將龜谿口江水又東南會北集
渠江水又右逕池谿口江水又東逕右龍又東逕羊腸
虎臂灘江水又東彭水注之江水又東右逕朐忍縣故
城南江水又東逕瞿巫灘江水又逕東陽灘江水又逕
魚復縣之故陵江水又東為落牛灘逕故陵北江水又
右逕夜清而東歷朝陽道口江水又東左逕新市里南

江水又東右合陽元水口江水又東逕南鄉峽東逕永安宮南江水又東逕諸葛亮圖壘南江水又東南逕赤岬西江水又東逕魚復縣故城南江水又東逕廣谿峽西過鄧縣東江水自關東逕弱關捍關南入于沔江水入東烏飛水注之江水又東逕巫縣故城南江水又東巫溪水注之江水又東逕巫峽江水歷峽東逕新崩灘江水又東逕石門灘又東過秭歸縣之南江水又東逕城北江水又東南逕夔城南江水又東逕歸鄉縣故城

北江水又東逕信陵縣南江水又東過夷陵縣南江水
歷峽東逕宜昌縣之埵窰下江水又東流頭灘江水又
東逕宜昌縣北江水又東逕狼尾灘而歷人灘江水又
東逕黃牛山江水又東逕西陵峽江水歷禹斷江江水
出峽東南流逕城故州江水又東逕故城北江水又東
逕白鹿巖江水又東歷荆門虎牙之門又東南過夸道
縣北夸水從狼山縣南東北注之江水又東逕土明城
北江水又東會沮口又南過江陵縣南江水又東逕驚

尾洲江水東得馬牧口江水又東逕江陵縣故城南江水又東逕郢城南江水又東得豫章口又東至華容縣西夏水出焉又東南當華容縣南湧水出焉江水又東涌水注之江水又逕南平郡孱陵縣之樂鄉城北又東南油水從西南來注之又東右合油口又東逕公安縣北江水左會高口江水又東得故市口江水又右逕楊岐北山大江又東左合子夏口大江又東左得侯臺水口大江右得龍穴水口江水自龍巢而東俞口又東得

清楊士塢二口大江右逕石首山北又東逕赭要江水
左得飯筐上口江水又右得上檀浦江水又東逕竹畦
南又東至長沙下雋縣北澧水沅水資水合東流注之
湘水從南來注之江水又東左得二夏浦又東逕彭城
口江水自彭城巖東逕如山北江水又左逕白螺山南
江水左逕止烏林南江水又東左得子練口江水左得
中陽水口又東得白沙口江水東右得聶口江水左逕
百人山南江水東逕大軍山南江水又東逕小軍山南

江水又東逕雞翅山北又東北至江夏沙羨縣西北沔水從北來注之江水又東逕歎父山南對歎州江水又東逕魯山南江水左得湖口水通太湖又東合瀾口水上承沔水於安陸縣而東逕瀾陽縣北東南注于江江水又東湖水自北南注謂之嘉吳江右岸頗得二夏浦北對東城洲西浦側有雍伏戍江之左岸東會龍驤水口出北山蠻中江之有武口水上通安陸之延頭江水東逕若城南又東過邾縣南江水右得黎嶼北江水又

東逕邾縣故城南鄂縣北江水右得樊口江水又左逕
赤鼻山南又東逕西陽郡南郡治即西陽縣也江之右
岸有鄂縣故城江水左則巴水注之又東逕較縣故城
南東會希水口出潛縣霍山西麓山北有潛縣故城大
江右岸有厭里口安樂浦江水左得赤水浦江水又東
逕南陽山南江水又東逕西陵縣故城南江水東歷孟
家澆江之右岸有黃石山水逕其北又東過蘄春縣南
蘄水從北東注之又東過下雉縣北邳水從東陵西南

注之又東左得青林口

青衣水

青衣水出青衣縣西蒙山東與沫水合也至犍為南安

縣入于江

桓水

桓水出蜀部岷山西南行羌中入于南海

若水

若水出蜀郡旄牛徼外東南至故關為若水也南過越

舊邛都縣西直南至會無縣淹水東南流注又東北至
犍為朱提縣西瀘江水又東北至犍道縣入于江

沫水

沫水出廣柔徼外東南過旄牛縣北又東至越嶲靈道
縣出蒙山南東北與青衣水合東入于江

延江水

延江水出犍為南廣縣又東至牂牁縣東屈北流至
巴郡涪陵縣注更始水又東南至武陵西陽縣入于酉

水

沅酉水

酉水東南至沅陵縣入于沅

存水

存水出犍為郁郅縣東南至鬱林定周縣為周水又東北至潭中縣注于潭

溫水

溫水出牂牁夜郎縣又東至鬱林廣鬱縣為鬱水又東

至領方縣東與斤南水合東北入于鬱

淹水

淹水出越嵩遂久縣徼外東南至蜻蛉縣又東過姑復縣南東入于若水

葉榆水

益州葉榆河出其縣北界屈從縣東北流過不韋縣東南出益州界入牂牁郡西隨縣北為西隨水又東出進桑關過交趾麋泠縣北分為五水絡交趾郡中至東界

復合為三水東入海

夸水

夸水出巴郡魚復縣江東南過狼山縣南又東過夸道縣北東入于江

油水

油水出武陵孱陵縣西界又東北入于江

澧水

澧水出武陵沅縣西歷山東過其縣南又東過零陽縣

之北又東過作唐縣北又東至長沙下窩縣西北東入于江

沅水

沅水出牂牁且蘭縣為旁溝水又東至鎮城縣為沅又東北過臨沅縣南又東至長沙下窩縣西北入于江

浪水

浪水出武陵鎮城縣北界沅水谷南至鬱林潭中縣與鄰水合又東至蒼梧陵縣為鬱溪又東至高要縣為大

水又東至南海番禺縣西分為二其一南入于海其一
又東過縣東南入于海員水又東南一千五百里入南
海

資水

資水出零陵都梁縣路山東北過夫夸縣東北過邵陵
縣之北又東北過益陽縣北又東與沅水合於湖中東
北入于江也

漣水

漣水出連道縣西資水之別東北過湘南縣南又東北至臨湘縣西南東入于湘

湘水

湘水出零陵始安縣陽海山東北過零陵縣東又東北過洮陽縣東又東北過泉陵縣西又東北過重安縣東又東北過鄱縣西泰水從東南來注之又東北過陰山縣西洙水從東南來注之又北過澧陵縣西澆水從東注之又北過臨湘縣西瀏水從縣西北流注又北瀉水

從西南來注之又北過羅縣西渭水從東來流注之又北過下雋縣西微水從東來流注之又北至巴丘山入于江

澌水

澌水亦出陽海山南過蒼梧荔浦縣又南至廣信縣入于鬱水

溱水

溱水出桂陽臨武縣南繞城西北屈東流東至曲江縣

安縣邑東屈西南流過滇陽縣出淮浦關與桂水合南入于海

滙水

滙水出桂陽縣盧聚東南過含滙縣南出滙浦關為桂水

深水

深水出桂陽盧聚西北過零陵營道縣南又西北過營浦縣南又西北過泉陵縣西北七里至燕室邪入于湘

鍾水

鍾水出桂陽南平縣都山北過其縣東又東北過宋渚亭又北過鍾亭與雞水合又北過魏寧縣之東又東北入于湘

耒水

耒水出桂陽郴縣南山又北過其縣之西又北過便縣之西又西北過耒陽縣之東又北過酃縣東北入于湘

洙水

涑水出茶陵縣上鄉西北過其縣西又西北過攸縣南
又西北過陰山縣南又西北入于湘

澆水

澆水出醴陵縣東澆山西過其縣南屈從縣西西北流
至澆浦注入于湘

瀏水

瀏水出臨湘縣東南瀏陽縣西北過其縣東北與潯溪
水合西入于湘

潁水

潁水出豫章艾縣西過長沙羅縣西又西累石山入于

湘水

贛水

贛水出豫章南野縣西北過贛縣東又西北過廬陵縣
西又東北過石陽縣西又東北過漢平縣南又東北過
新淦縣西又北過南昌縣西又北過彭澤縣西北入于

江

廬水

廬江水出三天子都北過彭澤縣西北入于江

漸江水

漸江水出三天子都北過餘杭東入于海

斤江水

斤江水出交趾龍編縣東北至鬱林領方縣東注于鬱
容容夜緬湛乘牛渚須無無濡營進皇無地零侵黎無
會重瀨夫省無變由蒲王都融勇外此皆出日南郡西

東東入于海

山澤

嵩高為中嶽在潁川陽城縣西北

泰山為東嶽在泰山博縣西北

霍山為南嶽在廬江灊縣西南

華山為西嶽在弘農華陰縣西南

雷首山在河東蒲坂縣東南

砥柱在河東大陽縣東河中

王屋山在河東垣曲縣東北也

太行山在河內野王縣西北

恒山為北嶽在中山上曲陽縣西北

碣石山在遼西臨渝縣南水中也

析城山在河東濩澤縣西南

太嶽山在河東永安縣

壺中山在河東北屈縣東

南龍門山在河東皮氏縣西

梁山在馮翊夏陽縣西北河上

荆山在馮翊懷德縣南

岐山在扶風美陽縣西北

關山在扶風汧縣之西也

隴山終南山惇物山在扶風武功縣西南也

須山在隴西臨洮縣西南

蟠冢山在隴西氐道縣之南

烏鼠同穴山在隴西首陽縣西南

積石在隴西河闕縣西南

都野澤在武威縣東北

合離山在酒泉會水縣東北

流沙地在張掖居延縣東北

三危山在燉煌縣南

朱圉山在天水北冀縣南

岷山在蜀郡湔氐道西

嶓冢山在弘農盧氏縣南

荆山在南郡臨沮縣東北

内方山在江夏竟陵縣東北

大别山在廬江安豐縣西南

外方山崧高是也

桐柏山在南陽平氏縣東南

陪尾山在江夏安陸縣東北

衡山在長沙湘南縣南

九江地在長沙下雋縣西北雲夢澤在南郡華容縣之

東東陵地在廬江金蘭縣西北數淺原地在豫章歷陵縣西南彭蠡澤在豫章彭澤縣北中江在丹陽蕪湖縣南東至會稽陽羨縣入于海震澤在吳縣南五十里北江在毘陵北界東入于江

嶧陽山在下邳縣之西

羽山在東海祝其縣南也

陶丘在濟陰定陶縣之西南

荷澤在定陶縣東雷澤在濟陰城陽縣西北荷水在山

陽湖陸縣南蒙山在太山蒙陰縣西南大野澤在山陽
鉅野縣東北大邳地在河南成臯縣北明都澤在梁郡
睢陽縣東北益州沱水在蜀郡汶江縣西南其一在郾
縣西南皆還入江荊州沱水在南郡枝江縣三澁池之
南在邛縣之北右禹貢山水澤地所在凡六十

說郛卷一百八下